

TEZAU LITURGIC

1 MARTIE

ACATISTUL SF. CUVIOASE-MUCENIȚE EVDOCHIA DE LA HELIOPOLIS



MOSCOVA, 2000



Акафист преподобномученице Евдокии

КОНДАК 1

Избранней Богом от рода самарянского и
воззванной от рова погибельного во ограду
Святых Церкви Его, к торжеству первородных,
на небесах написанных, сугубо венец приявшей,
преподобномученице Евдокии, похвальное
воззовем пение: много бо может молитва
праведных ко благосердию Всевышняго, во еже
от всяких бед спасти зовущия:
Радуйся, Евдокие, преподобная страсотерпице,
о спасении душ наших молитвеннице.

ИКОС 1

Ангельские чины и души праведных на небеси
радуются радостью великою о едином грешнике
кающемся, по неложному слову Господню. И мы
земнороднии зряще Твое преестественное от
глубины беззакония ко спасению возведение,
Евдокие пречудная, радуемся и Господа
благодаряще, в похвалу тебе зовем:
Радуйся, чудо милосердия Божия на себе
явившая;
Радуйся, дивныя благодати Христовы силу на

себе показавшая;
Радуйся, от тьмы греха в чудный свет Евангелия
воззванная;
Радуйся, от тины сластей велиаровых
избавльшеся, сладостей райских
приобщившаяся;
Радуйся, грешников покаяния образе;
Радуйся, о нашем от злых дел обращении
ходатаице;
Радуйся, Евдокие, преподобная страсотерпице,
о спасении душ наших молитвеннице.

КОНДАК 2

Виждь, Христе Спасе, и да не презриши мя,
молюся, грехми великими содержимаго, но
молитвами славныя преподобномученицы Твоея
Евдокии, ущедри и спаси мя, и Твоего Царствия
наследника мя покажи, да с мученики и
преподобными и всеми святыми воззову
благоутробию Твоему: Аллилуиа.

ИКОС 2

Разум человеческий недоумевае, помышляя, от
каковаго греха страшнаго на высоту
ангелоподобнаго жития благодатию Христовою
взошла еси, достохвальная Евдокие. Темже и
мы, добрую тя предстательницу имуще, молимся
тебе тепле: избави и нас от бездны греховныя,

да любовью вопием ти таковая:
Радуйся, благодати и света исполненная;
Радуйся, рабства диавольскаго избегшая;
Радуйся, агнице, во двор словесных Христовых
овец притекшая;
Радуйся, добраго Пастыря Христа сладкий глас,
зовущий тя, услышавшая;
Радуйся, драхмо погибшая и Христом
обретенная;
Радуйся, никомуже отчаяватися в велицей
греховней скорби побуждающая;
Радуйся, Евдокие, преподобная страсотерпице,
о спасении душ наших молитвеннице.

КОНДАК 3

Сила благодати преизобиловала тамо, идеже
умножися грех, да веселятся на небеси Ангели о
единем грешнице покаявшемся, и да радостно
сретают пред Престолом Божиим, поя: Аллилуиа.

ИКОС 3

Имеяй богатство милосердия, мытари и
грешники и неверныя призвал еси, Иисусе
Господи, и рабу Твою Евдокию, во гресех житие
иждившую и Тя познавшую, покаением и
крещением просветил еси, и к подвигу
преподобномученичества возвел еси. Нас же
ныне истинному покаению тоя научивши,

подвизаеши восхваляти ю пении сими:
Радуйся, душею твоею благодатию
обновившаяся;
Радуйся, мира греховнаго со страстьми и
похотьми его отрекшаяся;
Радуйся, чину иноческому добрый путь
показавшая;
Радуйся, постом, молитвою, и подвиги душу
свою от скверн греховных очистившая;
Радуйся, мученическою смертию течение свое
совершившая;
Радуйся, кровию твоею, за Христа излианною,
одежду свою брачную убелившая;
Радуйся, Евдокие, преподобная страсотерпице,
о спасении душ наших молитвеннице.

КОНДАК 4

Бури помыслов греховных люте одержимья
души твоея, Евдокие пречудная, коснуса
благодать Господня, егда дивным Того
промышлением приключися иноку Герману, во
обитель свою грядущу и нощию застигнуту во
граде Илиополе близ греховныя храмины твоея
приютитися, и по обычаю своему посреди нощи
во псалмех и пениях, и о страшнем судищи
Христовом чтении бодрствовать, и Богу
возглашати со умилением: Аллилуиа.

ИКОС 4

Слышав Евдокия, на ложе греховнем лежащая, посреде тишины нощныя глас инока о вечней славе праведников и страшных муках грешников дивно глаголющаго, абие от сна погибельнаго пробудися и на утрие иноком тем на путь спасения наставляема, от иерея же Божия в вере Христовой оглашаема, стези праведной всем сердцем прилепися. Мы же, таковому промыслению Божию о тебе чюдящися, воззовем:

Радуйся, дивнаго смотра Божия таиннице;

Радуйся, человеколюбия и щедрот Его печате;

Радуйся, муками адскими, грешников ожидающими, уstraшенная;

Радуйся, славою райскою, праведником уготованною, упоенная;

Радуйся, яко ноць, неверным несветлая, явися ти просвещением в сладости словес Божиих;

Радуйся, яко утру возсиявшу, возсия и в тебе свет благодатнаго обновления;

Радуйся, Евдокие, преподобная страсотерпице, о спасении душ наших молитвеннице.

КОНДАК 5

Божественною благодатию осененная и от мудраго Германа благочестию наученная, славная Евдокия прежде крещения своего

затвориши и седмь дний и седмь ношей,
блуднице Евангельской подобяшеся, в посте,
слезах покаяния и молитве всеусердне пребыть,
к подвигом предстоящим себе обогащая, и Богу,
грешники милующу, вопиюще: Аллилуиа.

ИКОС 5

Видения пресветлаго удостоися скоро
блаженная Евдокия, аще и немногия дни, но
усердно подвизавшаяся: Архангелом бо
Михаилом в горняя вознесена бывши и от ликов
святых сретаема, от духа же злобы в воздухе
оклеветаема и яростию безсильно теми
отторгаема, в радости велицей о своем
обращении уверися и обещания благодатнаго,
еже во вся дни жития ю сохранятьи, свыше
сподобися, сего ради вопием ти:

Радуйся, Богом предъизбранная и чудесным
изволением Его от беззаконий оправданная;

Радуйся, откровений небесных скоро
сподобившаяся;

Радуйся, селения райския еще во плоти
узревшая и сестрою от святых Божиих
именованная;

Радуйся, от князя тьмы во гресех, уже Богом
низложенных, облеченная, но от страшных
объятий его Ангелом сохраненная;

Радуйся, до скончания жития твоего от того же

Ангела соблюдаема быти утешена;
Радуйся, Евдокие, преподобная страсотерпице,
о спасении душ наших молитвеннице.

КОНДАК 6

Проповедуеши всем падшим и отчаянным
грешникам, всечестная Евдокие, Божие
человеколюбие и силу, како покаянием грешную
душу омывает, очищает, светлит и возводит
горе, и веселие творит силам небесным, с ними
же и мы бренными усты зовем: Аллилуиа.

ИКОС 6

Возсия дивным светом житие Евдокии
блаженныя, егда Боготканною одеждою
крещения облекшися и имения своя, грехом
неправедно приобретенная, ова нищим раздала,
ова же к ногам пресвитера церковнаго повергла,
сама же во обитель востекши, многия дни в
подвизех преподобнических благочестно
поживе. Таковое убо дивное и скорое жития
пременение зряще, возглашаем ей:

Радуйся, богатство скорогибнущее на нетленная
изменшая;

Радуйся, сокровищем неправедным други себе
на небеси Евангельски стяжавшая;

Радуйся, яко Христа ради духом и телом
обнищала еси;

Радуйся, Господа паче, якоже прежде той грех,
возлюбившая;
Радуйся, Тому без лености усердно, якоже
прежде сатане льстивому, ныне поработавшая;
Радуйся, Священная Писания скоро
уразумевшая и теми умудрена начальницею
спасаемых ставшая;
Радуйся, Евдокие, преподобная страсотерпице,
о спасении душ наших молитвеннице.

КОНДАК 7

Хотяй препятие сотворити твоему светлому к
небесам шествию, богоблаженная, исконный
враг рода человеческого внуши юноше
Филострату, прежде и послежде к тебе страстию
греховною пылающую, во одежде инока, аки
волку хищному, во обитель проникнути, иже
узрев тя пред собою, всякими словесы
льстивыми и образы тцашеся огонь греховный
возжещи в тебе, и паки к пути погибельному тя
отвратити, и во град Илиополь похитити. Но
силою Божиею, в тебе обитавшею, наказан
бысть, егда единым словом твоим паде к ногам
твоима. Паки же на утрие молитвою твоею, по
внушению свыше, к жизни возвратися, врага
посрами и сердцем возопи щедрому Богу:
Аллилуиа.

ИКОС 7

Новая самаряныня, по образу Евангельскому, воистинну явися Евдокия преподобная: та бо в беззаконии жительствовавши Самим Господом Христом при кладезе быв обретена, вседушно Тому прилепися, и житие исправив, в мучениях душу свою предаде за Него. Тако и сия, стопами оныя шествующи, теми же враты Царствия Небеснаго достиже. Темже первую восхваляюще, и последней воспеваем сицевая: Радуйся, вторая самаряныня, Фотинии самарянке подражавшая; Радуйся, источника жизни и спасения - Христа возжадавшая; Радуйся, неистовство страстей и любви плотскую отринувшая; Радуйся, вся узы и сети врага растерзавшая; Радуйся, тяжкое бремя студныя работы диавола во благое и легкое иго Христово пременившая; Радуйся, путем тем селений небесных достигшая и о нас тамо молитву творящая; Радуйся, Евдокие, преподобная страсотерпице, о спасении душ наших молитвеннице.

КОНДАК 8

Странное и преславное изменение твое, преподобная Евдокие, видяще демонов темныя полцы горько рыдаху; вся же силы небесныя,

радостью играюще, песнь Христу воспеваху, прославляюще Божие милосердие и велиим гласом зовуще: Аллилуиа.

ИКОС 8

Весь и всегда злобою преисполненный и тобою посрамленный змий лукавый, преподобная, новья козни противу тебе устрои: им же бо наущенный царь Аврелиан, мний богатство, тобою оставленное, во обители твоей хранимым быти, посла сына своего с воины его разграбити, живущия же тамо мечу предати; но внезапно сей чудесне близ обители недугом тяжким быв поражен и умерщвлен - твоими же молитвами паки жив и здрав соделан, смирися, раскаявся и со всем домом своим ко Христу обратися, и паки убо новую печаль врагу сотвори, тебе же радостно возопи сицевая:

Радуйся, невидимою силою Божиею охраняемая;

Радуйся, чудесы многими осияваемая;

Радуйся, покаяния усердная проповеднице;

Радуйся, многих неверных на путь спасения наставнице;

Радуйся, козней диавольских сокрушительнице;

Радуйся, злых умыслений его в добрыя начинания претворительнице;

Радуйся, мертвых силою Христовою воскресительнице;

Радуйся, Евдокие, преподобная страсотерпице, о спасении душ наших молитвеннице.

КОНДАК 9

Всеми добродетельми украшенное и великим воздержанием, подвигом причастное, явися чудное пребывание твое во обители, Евдокие премудрая, от силы бо в силу благочестно восходящи, высоты жития равноангельного достигла еси, и демона лукаваго, всюду ти досаждающа, ухищрения злыя во благо обращала еси, многия же неверныя и закоснелыя ко Христу привела еси, поющи Тому: Аллилуиа.

ИКОС 9

Витийство земнородных не довлеет достойно восхвалити твоя подвиги, всеславная. Кто бо довольно может изреци слезныя токи, яже в молитвах к Богу пролила еси, кто болезни твоя изочтет? Кто исповесть всенощныя бдения, со врагом видимыя и невидимыя борения, за Христа страдания и всю тесноту жития твоего? Весь бо град Илиополь, и обитель, и вся окрестная селения чудесы просветила и яко солнце просияла еси. Тем убо молим тя: озари лучами света твоего и наша сердца, испроси оставление грехов всем вопиющим тебе таковая:

Радуйся, помраченный образ Божий во
светлости велицей в себе вообразившая;
Радуйся, небесными ароматами благоухающая;
Радуйся, звездами чудес украшенная;
Радуйся, лучами всех добродетелей сияющая;
Радуйся, величия Божия всем концем земли
благовествующая;
Радуйся, Небо и землю к пению славы Господа
твоего призывающая;
Радуйся, Евдокие, преподобная страсготерпице,
о спасении душ наших молитвеннице.

КОНДАК 10

Спасителя всех и Господа Иисуса, в нощи ти
явльшася, узрела еси, Евдокие богоблаженная,
Той бо дщерию своею ты нарек, на подвиг
исповедничества и страданий за имя Его, славы
ради небесныя и многих заблудших к
обращению, призва ты, и ужасатися тебе
никакоже повелев, изволи тебе быти сопутником
и помощником Сам, Пресладкий, якоже и
обеща. Темже, сердцем чистая, сего
прелюбезнаго видения сподобившись, радостно
воспела еси Всемиловитому Спасу: Аллилуиа.

ИКОС 10

Царство тьмы и идолослужения мерзкаго
распространяя, Диоген правитель гонение на

христиан воздвиже, и тебе, Евдокие, аки истинную Христову служительницу, пояти пятьдесят воинов направи. Ты же, преподобная, видением чудным укрепленная, кивот с Божественными тайнами Христовыми с собою прияв, сама вольно в руке воинов предалася еси. Егда же на суде нечестивом мудрый ответ о Господе давши и муки жесточайшия за Христа претерпевши, многия чудеса именем Его соделала еси, тогда всех гонителей, мучителей и народа собрание к вере Его обратила еси, яже и взываху тебе сицевая:

Радуйся, Господа Иисуса преподобная ученице и исповеднице;

Радуйся, дивных чудес силою Того совершительнице;

Радуйся, Филострата блуднаго от погибели исхитившая;

Радуйся, Аврелиана завистлива с семейством его от сетей бесовских избавившая;

Радуйся, Диодора, тя появшаго, с воины и сродники от пути нечестия отринувшая;

Радуйся, и самого Диогена, твоего мучителя, со всем домом и множицею народа ко Христу приведшая;

Радуйся, Евдокие, преподобная страсотерпице, о спасении душ наших молитвеннице.

КОНДАК 11

Песнь благодарения воздаша тебе, пречудная Евдокие, прежде лютыя гонители, ныне же новопросвещенныя христианы града Илиополя, тобою в вере наученнии и чудесы просвещеннии. Подобаше бо чудесем преславым во граде сотворитися, да сама от погибели ко спасению обращена, и иным, в сетех диавольских сидящим, помощь явиши и, апостолом подобяшеся, вся народы твоя за собою к небеси приведеш и пети Вседержителю научиши: Аллилуиа.

ИКОС 11

Светло просияла еси в знамениях, славная Евдокие, и не токмо сама, но и людем, тобою обращенным, чудодействовати дар у Бога испросила еси: егда бо некий отрок Зинон, ядом змеиным угрызенный и сном смерти опочивый, молитвами новаго христианина Диодора во имя Иисуса Распята чудесне оживе, тогда вся люди паки Бога Живаго, в людях чудодействующа, восхвалиша, тебе же, наставнице своей, воспеша сицевая:

Радуйся, молитвеннице усердная за люди новопросвещенныя;

Радуйся, подвиги твоими Богу угодившая;

Радуйся, знаменьями страшными и неудобь

постигаемыми люди ко Христу обращающая;
Радуйся, ко живым господствующу и мертвыми
владычествующу Господу дерзновение велие
стяжавшая;
Радуйся, Евангелием предреченнаго чуда, еже
змеинаго жала смертнаго неврежденности,
свершения виновнице;
Радуйся, ветрограда Христова на земли, в
подражание Апостолом, благая насадительнице;
Радуйся, Евдокие, преподобная страсотерпице,
о спасении душ наших молитвеннице.

КОНДАК 12

Благодати велия и победоносных подвигов
преисполненную вседрагую твою главу, течения
своего пути добре совершившу, Евдокие
преподобная, аки сокровищницу благоплодну и
зрелу, Викентий, градоправитель нечестивый,
чрез воины мечем усекну, мняй службу
приносить богам мерзким. Сего же неподобный
не разуме, яко делом скверным приобщаясь,
вечныя муки и гибель себе стяжав, святей же
душе преподобномученицы яви вспоможение
скоро от телесе разлучитися и со Христом быти и
пети Тому со Ангелы и святыми: Аллилуиа.

ИКОС 12

Поюще дивное и нам грешным
многоназидательное твое житие, покаянием
омытое, добродетельми осиянное,
преподобномученичеством украшенное и
мученическим подвигом завершенное, святая и
богоблаженная Евдокие, Господа ты избравшаго
и к Себе приявшаго прославляем и на твое пред
величеством Его заступление уповающе, сладце
вопием ти, страстотерпице:

Радуйся, Агнца Божия проповедавшая и яко
агница Его закланная;

Радуйся, к жизни нестареющей и присносущней
благочестно преставившаяся;

Радуйся, Христу, Жениху твоему, светильник
уготовавшая;

Радуйся, кровию своею преподобнический венец
себе славно украсившая;

Радуйся, телес наших здравие и душ спасение;

Радуйся, яко нам грешным воспоминание твое
пресладко и всей Церкви имя твое пречестно;

Радуйся, Евдокие, преподобная страстотерпице,
о спасении душ наших молитвеннице.

КОНДАК 13

О, прехвальная и богоблаженная
преподобномученице Евдокие! Приими от нас
сие малое к тебе моление, и Свету

Неприступному предстоящи, молися
Всещедрому Богу, да по милости Своей отверзет
двери покаяния нам, студными душу грехми
окалявшим и в лености все житие свое
иждившим, и от мрака греховнаго ко светлому
отеческому дому востеци, имиже вестъ
судьбами, благодатно устроит, и райских
селений достигнути, и радостно пети с тобою да
сподобит: Аллилуиа.

(Сей 13 кондак читается трижды, потом 1-й икос и
1-й кондак).



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НУЖЕ
НЕБО**